



Antara barang-barang yang di kumpulkan untuk diserahkan kepada mangsa banjir di Terengganu.

UNISEL SERAH BANTUAN BANJIR DI TIGA DAERAH TERENGGANU



Prof Dr Anuar turut bersama-sama memindahkan barang-barang tersebut ke dalam lori.

Atas dasar keprihatinan terhadap bencana banjir yang berlaku di negara baru-baru ini, UNISEL mengambil inisiatif mengumpul pelbagai barang-barang untuk disalurkan bagi meringankan beban mangsa di tiga daerah di Terengganu.

Bantuan tersebut dihantar menggunakan lori ke Sekolah Rendah Islam Darul Takwa, Kemaman pada jam 12 tengah malam dan tiba pada jam 9.40 pagi 1 Januari lalu.

Ia disertai oleh 48 warga UNISEL terdiri daripada kakitangan serta pensyarah.

Bantuan tersebut diagihkan di Kemaman sebelum ia disalurkan di Kuala Berang serta Hulu Terengganu.

Bilik gerakan yang terdapat di ketiga-tiga kawasan tersebut akan menguruskan proses penyerahan bantuan.

Proses penyerahan pertama akan dibuat di Kampung Tempurung, Kemaman.

Bantuan ini diharapkan dapat mengurangkan beban yang dialami oleh mangsa-mangsa banjir yang kerugian harta benda.

Kesemua barang-barang yang terdiri daripada makanan, minuman, tuala wanita, lampin, susu, pakaian dan pelbagai lagi mula dikumpul sejak 26 Disember lalu.

Pusat bantuan yang dibuka di kedua-dua kampus Shah Alam serta Bestari Jaya sehingga semalam dibanjiri dengan orang ramai yang mahu menderma.

Pensyarah, kakitangan, pelajar serta orang ramai turut mengambil bahagian menderma pelbagai barangan.



PROF DR ANUAR TURUN PADANG SUNTIK SEMANGAT SUKARELAWAN UNISEL

Prof Dr Anuar menyodok kesan lumpur yang ada di perkarangan surau itu.

Sukarelawan UNISEL memulakan kerja-kerja mencuci sebuah surau serta stor perusahaan serunding di Kampung Laut, Tumpat, Kelantan

Seawal jam 7.30 pagi semua sukarelawan sudah berkumpul untuk memulakan perjalanan ke kampung tersebut.

Setibanya di kampung itu, rombongan UNISEL disambut mesra oleh penduduk kampung.

Malah Presiden yang juga merupakan Naib Canselor UNISEL, Prof Dr Anuar Ahmad juga sudah menanti di situ untuk bersama-sama dengan sukarelawan menjalankan tugas membersihkan kawasan itu.

Kedaaan di surau serta stor tersebut sememangnya dalam keadaan teruk ekoran kesan lumpur setinggi paras buku lali yang masih terdapat di situ.

Namun itu tidak mematahkan semangat para sukarelawan untuk berkhidmat membersihkan kembali kawasan tersebut

Dengan menggunakan hanya beberapa kelengkapan yang ada, para sukarelawan bertungkus-lumus mencuci.



Sukarelawan UNISEL tidak kenal erti penat lelah membersihkan surau berkenaan.



Stor perusahaan serunding yang terjejas teruk akibat kesan lumpur yang tebal.

Mereka tambah bersemangat melihat Prof Dr Anuar serta Dekan Fakulti Perniagaan, Prof Madya Dr Mohd Fuad Mohd Salleh yang turut serta mencuci kawasan itu.

Dalam pada itu, penjaga surau tersebut, Basmah Mustapha berterima kasih kepada para sukarelawan kerana sudi membantu.

Menurutnya, sebelum ini terdapat juga beberapa kumpulan yang hadir di kampung tersebut.

Para sukarelawan UNISEL turut mencuci perkarangan rumah Basmah yang terletak bersebelahan surau itu.

"Mak cik ucap terima kasih banyak kerana tolong cuci kawasan ini," katanya.

Kampung tersebut merupakan antara kawasan terjejas teruk semasa banjir besar melanda Kelantan tempoh hari.

Kira-kira 800 keluarga di kampung tersebut terjejas teruk selama beberapa hari.

Difahamkan air naik setinggi paras hampir dua meter.